

Կ Ա Ր Գ

ԵՐԵՎԱՆԻ ՔԱՂԱՔԱՊԵՏԻ ԱՌԱՋԻՆ ԵՐԴՄԱՆ ԱՐԱՐՈՂՈՒԹՅԱՆ

1. Նորընտիր Երևանի քաղաքապետի առաջին երդման արարողության նպատակով՝ Երևանի քաղաքապետի ընտրվելուց հետո երրորդ օրացուցային օրը, ժամը **11.00**-ին օրենքի ուժով հրավիրվում է Երևանի ավագանու նիստ: Նիստը տեղի է ունենում Երևանի ավագանու նստավայրում՝ Երևան քաղաքի Արգիշտիի **1** հասցեում:

2. Երևանի քաղաքապետի առաջին երդման արարողության նախապատրաստման և անցկացման կազմակերպման պատասխանատուն «Երևանի քաղաքապետարանի աշխատակազմ» պետական կառավարչական հիմնարկն է (այսուհետ՝ աշխատակազմ):

3. Աշխատակազմը ժամը **10.00 - 11.00**-ն գրանցում է ավագանու անդամներին:

4. Ավագանու նիստն իրավագոր է, եթե նիստին ներկա է առնվազն ավագանու **33** անդամ: Եթե կես ժամվա ընթացքում չի ապահովվում նիստի իրավագորությունը, ապա ավագանու նիստ է գումարվում հաջորդ օրը, ժամը **11.00**-ին:

5. Նիստը վարում է ավագանու նիստին ներկա՝ տարիքով ավագ անդամը:

6. Նիստը վարողը հայտարարում է նիստի օրակարգը՝ Երևանի քաղաքապետի երդում:

7. Նիստին ներկա են գտնվում Հայաստանի Հանրապետության փոխվարչապետ, Հայաստանի Հանրապետության տարածքային կառավարման նախարարը, Հայ Առաքելական եկեղեցու Արարատյան Հայրապետական թեմի առաջնորդը (համաձայնությամբ), հրավիրված պետական, եկեղեցական, մշակութային և հասարակական գործիչները:

8. Նիստը վարողն ընտրված քաղաքապետին հրավիրում է ամբիոնի մոտ: Ամբիոնին մոտենալուց հետո՝ ընտրված քաղաքապետն արտասանում է երդման տեքստը.

«Ստանձնելով Հայաստանի Հանրապետության մայրաքաղաք Երևանի քաղաքապետի պաշտոնը՝ երդվում եմ.

Երևանի քաղաքապետի լիազորություններն իրականացնելու ընթացքում պահպանել Հայաստանի Հանրապետության Սահմանադրությունը, օրենքները, Երևանի ավագանու որոշումները, ազնվորեն և բարեխղճորեն կատարել Երևանի քաղաքապետի լիազորությունները, ծառայել Երևանի բարգավաճմանը, գործել ի բարօրություն նրա բնակիչների:

Պարտավորվում եմ հոգ տանել մեր հնագույն մայրաքաղաքի փառքի պահպանման և բազմապատկման համար, պաշտպանել համայնքի իրավունքները, օրինական շահերը և սեփականությունը, ուժերիս անմնացորդ նվիրումով սատարել ժողովրդի հավատին, նպաստել նրա նյութական և հոգևոր վերելքին:

Աջակից լինել ամեն մի ազնիվ նախաձեռնության, որը միտված կլինի իմ համաքաղաքացիների նվիրական գաղափարների իրականացմանը:»:

**9.** Երդումն արտասանելուց հետո հնչում է Երևան քաղաքի օրհներգը: Երևանի քաղաքապետն ստորագրում է երդման տեքստի տակ, որն ի պահ է հանձնվում Երևան քաղաքի թանգարան:

**10.** Երդման տեքստն ստորագրվելուց հետո՝ նիստը վարողը Ելույթի համար ձայնը տալիս է Երևանի քաղաքապետին:

**11.** Ելույթի համար տրվում է մինչև **20** րոպե ժամանակ:

**12.** Ելույթից հետո Երևանի քաղաքապետն զբաղեցնում է նախագահողի տեղը և շարունակում վարել նիստը:

**13.** Ողջույնի խոսքերով կարող են հանդես գալ Հայաստանի Հանրապետության փոխվարչապետ, Հայաստանի Հանրապետության տարածքային կառավարման նախարարը, Հայ Առաքելական եկեղեցու Արարատյան Հայրապետական թեմի առաջնորդը, ինչպես նաև կարող են հրապարակվել ուղերձներ:

14. Ողջույնի խոսքերից և ուղերձների հրապարակումից հետո Երևանի քաղաքապետը հայտարարում է նիստը փակված:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ  
ՂԵԿԱՎԱՐ

Դ. ՍԱՐԳՍՅԱՆ